

# INUIT ATAQATIGIIT

## INATSISARTUNI



4. september 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

**1.**

**Pisassiissutitaqanngitsumik qaleralinniarfiujumaartussat eqqarsaatigalugit qalerallit aalisapilunneqannginnissaannut qulakkeerisussamik Naalakkersuisut qanoq iliuseqarnialersaarpap, aammalu taamatut pisassiissutitaqanngitsumik qaleralinniarfissanik pilersitsinissaq biologit innersuussinerannut naapertuuppa?**

**2.**

**Taamatut pisassiissutitaqanngitsumik qaleralinniarfissat qanittuanni qaleralinniarnermut qanoq sunniuteqarnissaa Naalakkersuisunit naatsorsuutigineqarpa? Sumiiffinni pisassiissutitaqartuni tunisinerit appariarnissaat Naalakkersuisuniit naatsorsuutigineqarpa, tassami aalisartut pisassiissutiminnik "sipaarniarlutik" pisassiissutitaqarfiunngitsuni aalisarnissartik qinissavaat?**

**3.**

**Ukiuni tallimani kingullerni qalerallit tunisat sumerpiaq aalisarneqarsimanerannut Naalakkersuisut paasissutissaataateqarpap? Taamaassappat paasissutissat taakkua akissummut ilannguteqquneqarput. Sumiiffiit maanna allannguuteqarfiusut kisiisa paasisaqarfigerusuppakka.**

**4.**

**Aalisarnerup iluani qalerallit MSC-mik nalunaaqutserneqarnissaannik kissaateqarnermut allannguinerit Naalakkersuisunit sunniuteqassangatinneqarpap?**

**5.**

**Tusarniaasitsinermit akissutit Namminersorlutik Oqartussat nittartagaanni nasaarisinnaasimangilakka. Naalakkersuisunit ilisimatitsissutigineqaqquneqarpoq tusarniaanermi akissutit isornartorsiunertaqarnerisut, kikkunniillu sutigullu isorinnittoqarsimanagera paaserusupparput.**

**6.**

**Killeqarfinnik allannguinerit pisassiissutitaqanngitsumillu qaleralinniarfissaqalernerit pillugit nunat tamalaat akornanni eqqartorneqarnerlunnikkut qaleralinnik avammut tunisassiornerup appariaateqarsinnaaneramik isumakuluuteqarnera Naalakkersuisunit isumaqataaffigineqarpa? Killeqarfinnik taamatut allannguinerit sinerissamut qanittumi qaleralinniarnerup 'akuerineqarsinnaanngitsut inissinneqarnissaanik' Naalakkersuisut sutigut ulorianaatinik tikkuussisinaappat?**

**7.**

**Killeqarfiit allanngortinneqarnerinut atatillu Naalakkersuisut aningaaserivinnik oqaloqatiginnissimappat? Sumiiffiit pisassiissutitaqanngitsut atulersinneqarnissaanni aalisartut pisassiissutaateqartut, pisassiissutillu taakkua uppernarsaasiullugit aningaaserivimmi attartorsimasut eqqarsaatigalugit pisassiissutaasa na-**

**limikkut appariaateqarnissaat pisinnaava, taamatullu attartornermi isuman-naassuseq ajorseriarsinnaava?**

**8.**

**Junimi 2013-imi eqqissimatitsinermut avatangiisinullu ataatsimiititaliamut akissummini taamanikkut aalisarnermut naalakkersuisuusoq Karl Lyberth akisuteqarpoq, qaleralinnut, assagiarsunnut saarullinnullu aqutsinikkut pilersaarusiortoqarnissaanik pilersaartoqartoq. Pilersaarutit taakkua qanoq ingerlapat?**

**9.**

**Taamanikkut Naalakkersuisuusup allakkani taakkunani ilisimatitsissutigivaa Aalisarnermut inatsisip kukkunerisiorneqarneranut atatillugu Naalakkersuisut aalisarnerup iluani nungusaataangitsumik annertunerusumik ingerlatsinissaa 'assut pingaaruteqartoq'. Naalakkersuisut suli taamatut isummeqqappat?**

(Inatsisartuni ilaasortaq Naaja H. Nathanielsen, Inuit Ataqatigiit)

### **Tungavilersuut**

15. september killigalugu Naalakkersuisut Upernavimmi, Uummannami aamma Diskobugtumi aqutsisoqarfinni qaleralinniarnermi killeqarfinnik allannguiniarput.

Naalakkersuisut allannguinnissami tungavilersuutigivaat Siumumi ilaasortap Karl Kristian Krusep aalajangiiffigisassatut siunnersuutaa allannguinnissami aallaavigineqartoq. Karl Kristian Krusep tungavilersuutigivai qaleralinniarneq killilersuiffigineqarpallaartoq atavarnerusumillu aalisarsinnaaneq pisariaqartinneqartoq.

Naalakkersuisooqatigiit isumaqatigiissutaanni "Nuna ataasiusoq – inuiaat ataatsimoorut"-ni nungusaataangitsumik atuinissaq avatangiisinilluunniit eriaginittuunissaq, ingerlassanut annertuunut atatillugu taasaqallatsiarneq eqqaassanngikkaanni, eqqaaneqanngillat. Taamaattumik tamanna Naalakkersuisut nungusaataangitsumik aqutsinissamut politikkeqannginnerannik isumaqarnarsinnaavoq, taamaasillunilu nalunaarut nutaaq matumani pineqartoq Naalakkersuisut politikkiannut naapertuuttutut taasariaqarluni.

Politikkimut tassunga isumaqataagaanni imaluunniit isumaqataangikkaanni kingunissanik paasitinneqarnissaq soqutiginarpoq, tassami tamanik eqquisussaavoq siunissamilu qanoq iliuseqarsinnaanermut sunniuteqassalluni. Aalisartut inuiaqatigiillu sinneri eqqarsaatigalugit qalerallit aalisapilunneqannginissaat pingaaruteqarpoq, taamaattoqassappammi tamatsinnut sakkortuumik eqquisoqassaaq.

Ullut qulit qaangiutinnginnerini akineqarnissara qinnutigivara.